



Na osnovu poglavlja VI člana 2. i 4. Ustava Federacije Bosne i Hercegovine ("Službene novine Federacije BiH", broj: 1/94, 13/97, 16/02, 22/02, 52/02, 60/02, 18/03, 63/03, 9/04, 20/04, 33/04, 71/05, 72/05, 88/08, 79/22, 80/22, i 31/23), člana 36. Ustava Kantona Sarajevo ("Službene novine Kantona Sarajevo", broj: 1/96, 2/96, 39/96, 16/97, 14/00, 4/01, 28/04, 6/13 i 31/17) i člana 13. stav 2. alineja 1) Zakona o principima lokalne samouprave u Federaciji Bosne i Hercegovine ("Službene novine Federacije BiH" broj: 49/06 i 51/09), Općinsko vijeće Općine Stari Grad Sarajevo, na 36. redovnoj sjednici održanoj 30.04.2024. godine donijelo je

STATUT OPĆINE STARI GRAD SARAJEVO

I – OSNOVNE ODREDBE

Član 1. (Predmet Statuta)

Ovim Statutom uređuje se samoupravni djelokrug Općine Stari Grad Sarajevo (u daljem tekstu: Općina), u skladu sa Ustavom i Zakonom, organizacija, ovlaštenja i način rada organa Općine, međusobni odnosi Općinskog načelnika i Općinskog vijeća, osnivanje i rad mjesnih zajednica, oblici neposrednog odlučivanja građana o lokalnim poslovima i neposredno učestvovanje građana u odlučivanju, organizacija i rad lokalne uprave, imovina i finansiranje Općine, propisi i drugi akti Općine, javnost i transparentnost rada, upravni nadzor, oblici saradnje sa višim nivoima vlasti i drugim općinama, te druga pitanja od značaja za organizaciju i rad Općine.

Član 2. (Naziv i sjedište)

- (1) Općina Stari Grad Sarajevo je jedinica lokalne samouprave sa pravima i obavezama utvrđenim Ustavom Federacije Bosne i Hercegovine i Ustavom Kantona Sarajevo (u daljem tekstu: Ustav), federalnim i kantonalnim zakonima (u daljem tekstu: Zakoni) i ovim Statutom.
- (2) Općina ima svojstvo pravnog lica.
- (3) Naziv Općine: Općina Stari Grad Sarajevo
- (4) Sjedište Općine: Sarajevo, ulica Zelenih beretki broj 4.

Član 3. (Obuhvat područja Općine)

- (1) Područje Općine obuhvata naseljena mjesta određena Dejtonskim sporazumom, a u njenom sastavu su sljedeće mjesne zajednice: Babića bašča, Bašćaršija, Bistrik, Hrid-Jarčedoli, Kovači, Logavina, Mahmutovac, Medresa, Mjedenica, Sedrenik, Sumbuluša, Širokača, Toka – Džeka, Ferhadija, Vratnik i Moščanica.

- (2) Granice područja Općine idu katastarskim granicama naseljenih mjesta koja ulaze u sastav Općine u skladu sa Zakonom i drugim propisima kojima se određuju naseljena mjesta. Granice Općine ucrtane su u katastarskom operatu, koji se nalazi i čuva u Općini.

Član 4.
(Izmjena područja, naziva i sjedišta Općine)

- (1) Područje Općine, njen naziv i sjedište može se izmijeniti u skladu sa Ustavom, Zakonom i drugim propisima, s tim da promjene granica Općine mogu biti izvršene Zakonom zavisno od rezultata provedenog referenduma o promjeni granica Općine, koji će provesti Općinsko vijeće.
- (2) Prije davanja saglasnosti Općinsko vijeće će provesti lokalni referendum građana o promjeni granica Općine.

Član 5.
(Službeni jezici)

- (1) Službeni jezici u Općini su bosanski, hrvatski i srpski, a ostali jezici se mogu koristiti kao sredstvo komunikacije.
- (2) Službena pisma su latinica i cirilica.

Član 6.
(Obilježja i dani Općine)

- (1) Općina ima grb, zastavu, pečat kao svoja obilježja, a može imati i druga obilježja koja svojom odlukom utvrdi Općinsko vijeće, kao i druge simbole.
- (2) Odlukom Općinskog vijeća odlučuje se o izradi, upotrebi i prestanku važenja obilježja.
- (3) Dan Općine je 02. maj.
- (4) Općina može odrediti i druge dane obilježavanja odnosno spomena na događaje i osobe od posebnog značaja za Općinu.
- (5) Način obilježavanja dana od značaja odnosno događaja, uredit će se posebnom odlukom Općinskog vijeća.
- (6) Priznanja Općine, kao i procedura i način dodjele istih uredit će se posebno Odlukom Općinskog vijeća.

Član 7.
(Pečat)

- (1) Općina ima pečat oblika kruga promjera 30mm i 50 mm.
- (2) Sadržaj pečata, davanje odobrenja za izradu pečata, način vođenja evidencije o izdatim pečatima, način uništavanja pečata i druga pitanja od značaja za izradu i korištenje pečata uredit će se posebnom odlukom Općinskog vijeća.

Član 8.
(Saradnja sa drugim subjektima)

- (1) Općina uspostavlja i održava saradnju s drugim jedinicama lokalne zajednice u zemlji i inostranstvu ostvarujući zajednički interes u unapređivanju privrednog, društvenog i kulturnog razvoja, a sve u skladu sa zakonom i međunarodnim ugovorima.
- (2) Općinsko vijeće donosi odluku o uspostavljanju saradnje kada ocijeni da postoji dugoročan i trajan interes za uspostavljanje saradnje i mogućnosti za njezino razvijanje.
- (3) Kriteriji za uspostavljanje saradnje, te postupak donošenja odluke o saradnji uređuju se posebnom odlukom Općinskog vijeća.
- (4) O uspostavljenoj saradnji zaključuje se sporazum (ugovor, povelja, memorandum ili sl.).
- (5) Sporazum o saradnji Općine i lokalne ili regionalne jedinice druge države objavljuje se u službenim novinama Kantona Sarajevo i na web stranici Općine.
- (6) Općinsko vijeće, Općinski načelnik i upravna tijela Općine obavezna su da sarađuju sa Uredom za borbu protiv korupcije.

**II – OSTVARIVANJE I ZAŠTITA LJUDSKIH PRAVA I SARADNJA
INSTITUCIJAMA ZA ZAŠTITU LJUDSKIH PRAVA**

Član 9.
(Poštivanje temeljnih prava i sloboda)

- (1) U obavljanju poslova iz svoje nadležnosti Općina će poštovati temeljna prava i slobode svakog građanina i konstitutivnih naroda: Bošnjaka, Hrvata, Srba i Ostalih, te će u najvećoj mogućoj mjeri osigurati njihovu zastupljenost u skladu sa članom IX 11 a. Ustava Federacije Bosne i Hercegovine.
- (2) Na području Općine, pripadnicima nacionalnih manjina garantuju se i osiguravaju osnovna prava i zaštita ravnopravnog sudjelovanja u javnim poslovima u skladu sa Ustavom, zakonom, ovim Statutom i općim i pojedinačnim aktima organa Općine.
- (3) Općina će osigurati jednaka prava i zalagati se za jednake životne uslove svih građana, uvažavajući nacionalni, vjerski i kulturni identitet i podsticat će miroljubivi suživot, bez diskriminacije po bilo kom osnovu.

Član 10.
(Dosljedna primjena prava)

Svi općinski organi vlasti i njihova tijela, općinske službe za upravu i institucije koje vrše javna ovlašćenja, dužni su u vršenju poslova iz svoje nadležnosti primjenjivati i dosljedno poštovati prava i slobode građana predviđene propisima iz člana 9. Statuta.

Član 11.
(Saradnja sa ombudsmenima)

Svi općinski organi vlasti i njihova radna tijela koja imaju javna ovlašćenja dužni su, na zahtjev ombudsmena i njihovih zamjenika, omogućiti ispitivanje djelatnosti bilo kojeg organa vlasti Općine i bilo koje druge institucije ili osobe koje su ugrozile ljudsko dostojanstvo, prava ili slobode, uključujući provođenje etničkog progona ili održavanja njegovih

posljedica, dati potrebne informacije, dokumente i spise, omogućiti uvid u sva službena dokumenta, uključujući i tajne upravne spise i omogućiti saradnju od svake osobe, uključujući bilo kog službenika, i namještenika posebno u prikupljanju potrebnih informacija o zaštiti ljudskih prava i osnovnih sloboda na području Općine.

Član 12.

(Saradnja sa međunarodnim tijelima)

Svi općinski organi vlasti dužni su, u okviru svojih prava i dužnosti, saradivati sa svim međunarodnim posmatračkim tijelima za ljudska prava, osnovanim za Bosnu i Hercegovinu i Federaciju Bosne i Hercegovine, kao i sa nadzornim tijelima osnovanim instrumentima Aneksa Ustava Federacije Bosne i Hercegovine.

Član 13.

(Obaveze Općinskog načelnika u saradnji sa ombudsmenima i međunarodnim tijelima)

Općinski načelnik odgovoran je za saradnju i omogućavanje ostvarivanja funkcije ombudsmena i međunarodnih nadzornih tijela, a posebno za saradnju sa općinskim službama za upravu i institucijama koje imaju javna ovlaštenja, predviđena ustavom, zakonom i ovim Statutom.

III – SAMOUPRAVNI DJELOKRUG OPĆINE

Član 14.

(Samoupravni djelokrug Općine)

- (1) Općina, kao jedinica lokalne samouprave je samostalna u odlučivanju u poslovima iz samoupravnog djelokruga u skladu sa Ustavom i zakonom, a podliježe nadzoru ustavnosti i zakonitosti kojeg obavljaju nadležni organi Federacije BiH i Kantona Sarajevo.
- (2) Isključive nadležnosti Općine, u skladu sa Ustavom i Zakonom su:
 - 1) osiguranje i zaštita ljudskih prava i osnovnih sloboda u skladu sa Ustavom;
 - 2) donošenje Budžeta Općine;
 - 3) donošenje programa i planova razvoja Općine i stvaranje uvjeta za privredni razvoj i zapošljavanje;
 - 4) osiguranje utvrđivanje i provođenje politike planiranja i uređenja prostora i zaštite okoliša na teritoriji Općine, te donošenje Općinskog plana zaštite okoliša;
 - 5) odlučivanje o raspolaganju stanovima u vlasništvu Općine i davanju u zakup stanova u vlasništvu Općine, te obezbjeđivanje sredstava za hitne intervencije u stambenim zgradama na području Općine;
 - 6) uređivanje i obezbjeđivanje korištenja poslovnih prostora u vlasništvu Općine, te propisivanje visine naknade i vršenje nadzora nad korištenjem poslovnih prostora;
 - 7) utvrđivanje politike korištenja i utvrđivanje visine naknada za korištenje javnih dobara;
 - 8) utvrđivanje i vođenje politike raspolaganja, korištenja i upravljanja građevinskim zemljištem;

- 9) upravljanje i raspolaganje imovinom Općine;
- 10) rješavanje u upravnom postupku u skladu sa zakonom;
- 11) upravljanje prirodnim resursima Općine i raspodjele sredstava ostvarenih na osnovu njihovog korištenja;
- 12) izgradnja, upravljanje, finansiranje i unapređenje djelatnosti i objekata lokalne komunalne i informacijsko komunikacijske tehnološke infrastrukture;
- 13) osnivanje, upravljanje, finansiranje i unapređenje ustanova predškolskog i osnovnog odgoja i obrazovanja;
- 14) osnivanje, upravljanje, unapređenje i finansiranje ustanova i izgradnja objekata za zadovoljavanje potreba stanovništva u oblasti kulture i sporta;
- 15) organizovanje kulturnih i sportskih manifestacija i sportskih takmičenja od značaja za Općinu;
- 16) pravno normira i uređuje aktivnosti na planu rada sa mladima i omladinskih aktivnosti;
- 17) ocjenjivanje rada ustanova i kvaliteta usluga u djelatnosti zdravstva, socijalne zaštite, obrazovanja, kulture i sporta, te osiguranje finansijskih sredstava za unapređenje njihovog rada i kvaliteta usluga u skladu sa potrebama stanovništva i mogućnostima općine;
- 18) analiza stanja javnog reda i mira, sigurnosti ljudi i imovine i pravno normira uvjete i mjere iz svoje nadležnosti prema nadležnim organima MUP-a;
- 19) organiziranje, provođenje i odgovornost za mjere zaštite i spašavanja ljudi i materijalnih dobara od elementarnih nepogoda i prirodnih katastrofa;
- 20) uspostavljanje i vršenje inspeksijskog nadzora nad izvršavanjem propisa iz isključivih nadležnosti općine i prenesenih nadležnosti utvrđenih posebnim propisom;
- 21) donošenje propisa o porezima, naknadama, doprinosima i taksama iz nadležnosti Općine;
- 22) raspisivanje referenduma za područje Općine;
- 23) raspisivanje javnog zajma i odlučivanje o zaduženju Općine;
- 24) preduzimanje mjera za osiguranje higijene i zdravlja;
- 25) osiguravanje uvjeta rada lokalnih elektronskih i printanih medija u skladu sa zakonom;
- 26) osiguravanje i vođenje evidencija o ličnim stanjima građana i biračkih spiskova;
- 27) organizuje efikasnu lokalnu upravu prilagođenu lokalnim potrebama, te obavlja upravne poslove iz svoje nadležnosti;
- 28) poslovi iz oblasti premjera i katastra zemljišta i evidencija o nekretninama;
- 29) uspostavljanje organizacije mjesne samouprave;
- 30) podsticaj razvoja civilnog društva;
- 31) briga o zaštiti životinja;
- 32) briga o turističkim resursima Općine;
- 33) zaštita i unapređenje prirodnog okoliša;
- 34) očuvanje prirodne baštine, te historijskog, kulturnog i graditeljskog nasljeđa.
- 35) obavljanje i drugih poslova koji su joj preneseni u nadležnost u skladu sa zakonom.

Član 15.

(Zajednički poslovi u pogledu komunalne infrastrukture)

- (1) Općina, Grad Sarajevo i Kanton Sarajevo mogu vršiti zajednički poslove upravljanja, finansiranja i unapređenja djelatnosti i objekata nedjeljive komunalne infrastrukture i to:

1. vodosnabdijevanje, odvod i prečišćavanje otpadnih voda;
 2. održavanje javne čistoće;
 3. snadbijevanje prirodnim gasom;
 4. organizovanje i unapređenje gradskog javnog prevoza.
- (2) Zajedničko vršenje poslova iz prethodnog stava uredit će se sporazumom između Općine, Grada i Kantona Sarajevo uz saglasnost Općinskog i Gradskog vijeća.

Član 16.
(Prenos poslova)

- (1) Obavljanje pojedinih poslova iz samoupravnog djelokruga Općine može se u skladu sa zakonom povjeriti ustanovama, preduzećima i drugim pravnim licima osnovanim radi obavljanja javnih službi, o čemu odluku donosi Općinsko vijeće.
- (2) Općina se bavi svim pitanjima od lokalnog značaja koja nisu isključena iz njene nadležnosti niti dodijeljena u nadležnost neke druge vlasti.
- (3) Ukoliko federalne odnosno kantonalne vlasti svoje poslove povjere Općini bez prethodnog konsultovanja ili se Općina prilikom konsultovanja negativno izjasni o povjeravanju tih poslova, a federalna odnosno kantonalna vlast donese zakon kojim određene poslove ipak povjerava Općini, Općinski načelnik dužan je odmah obavijestiti Općinsko vijeće i u tom slučaju Općina je dužna tražiti zaštitu prava na lokalnu samoupravu pred Ustavnim sudom Federacije Bosne i Hercegovine.

IV DIO – ORGANI OPĆINSKE VLASTI

Član 17.
(Organi Općine)

Organi Općine su Općinsko vijeće i Općinski načelnik, koji svoju funkciju vrše u skladu sa Ustavom, zakonom i ovim Statutom.

Član 18.
(Odnosi između organa Općine)

- (1) Međusobni odnosi Općinskog vijeća i Općinskog načelnika, zasnivaju se na principima međusobnog uvažavanja i saradnje, uz pojedinačnu odgovornost za ostvarivanje vlastitih nadležnosti i zajedničku odgovornost za funkcionisanje jedinica lokalne samouprave.
- (2) Ovlaštenja i obaveze koje proizilaze iz samoupravnog djelokruga Općine podijeljene su između predstavničkog organa Općinskog vijeća i izvršnog organa Općinskog načelnika.
- (3) Ako zakonom ili drugim propisom nije jasno određeno koji je organ nadležan za obavljanje poslova iz samoupravnog djelokruga Općine, svi poslovi i zadaci koji se odnose na uređivanje odnosa iz samoupravnog djelokruga Općine (normativne naravi) u nadležnosti su Općinskog vijeća, a svi izvršni poslovi i zadaci u nadležnosti su Općinskog načelnika.
- (4) Općinsko vijeće može prenijeti dio svojih ovlasti na radna tijela Općinskog vijeća Stari Grad Sarajevo ili ovlastiti Općinskog načelnika za obavljanje određenih poslova.

- (5) Ako se radi o izvršnim poslovima, a nije određena nadležnost za njihovo obavljanje, nadležna je služba koju ovlasti Općinski načelnik.

Član 19.
(Nespojivost funkcija)

Funkcije Općinskog načelnika i državnih službenika Općine Stari Grad Sarajevo su nespojive sa funkcijom vijećnika u Općinskom vijeću po osnovu odgovarajućih odredaba Izbornog zakona BiH, Zakona o državnoj službi Kantona Sarajevo i drugih važećih propisa koji definišu navedena pitanja.

V – OPĆINSKO VIJEĆE STARI GRAD SARAJEVO

Član 20.
(Općinsko vijeće)

- (1) Općinsko vijeće je organ odlučivanja i predstavničko tijelo građana, koje poslove iz svoje nadležnosti vrši u skladu sa Ustavom, Zakonom i ovim Statutom.
- (2) Članovi Općinskog vijeća odgovaraju za ustavnost i zakonitost akata koje Općinsko vijeće donosi u okviru svojih nadležnosti.

Član 21.
(Izbor i sastav Općinskog vijeća)

- (1) Općinsko vijeće čini 31 vijećnik, čiji se izbor vrši na način i po postupku utvrđenim Izbornim zakonom Bosne i Hercegovine
- (2) Mandat članova Općinskog vijeća traje četiri godine.

Član 22.
(Konstituirajuća sjednica)

Prva, konstituirajuća sjednica novoizabranog Općinskog vijeća održava se najkasnije u roku od 30 dana od dana objavljivanja rezultata izbora u skladu sa Poslovníkom o radu Općinskog vijeća.

Član 23.
(Poslovník o radu Općinskog vijeća)

Poslovníkom o radu Općinskog vijeća uređuje se način rada na sjednicama Općinskog vijeća, konstituisanje istog, prava i obaveze vijećnika, predsjedavajućeg, zamjenika predsjedavajućeg Općinskog vijeća, način njihovog izbora, imenovanja i razrješenja, način odlučivanja i donošenje propisa i drugih općih i pojedinačnih akata Općinskog vijeća, te druga pitanja koja se odnose na rad i funkcioniranje Općinskog vijeća.

Član 24.
(Klubovi vijećnika)

- (1) Radi olakšavanja rada Općinskog vijeća i unapređenja međustranačke saradnje općinski vijećnici mogu obrazovati klubove vijećnika parlamentarnih stranaka koje učestvuju u radu Općinskog vijeća, kao i klubove nezavisnih i samostalnih vijećnika.
- (2) Obrazovanje, djelokrug i način rada klubova vijećnika detaljnije se uređuju Poslovníkom o radu Općinskog vijeća.

Član 25.
(Kolegij Općinskog vijeća)

- (1) U cilju unapređenja efikasnosti i usklađivanja rada Općinskog vijeća, formira se Kolegij Općinskog vijeća.
- (2) Sastav Kolegija, djelokrug i način rada uređuju se Poslovníkom o radu Općinskog vijeća.

Član 26.
(Nadležnost Općinskog vijeća)

- (1) Općinsko vijeće u okviru svojih nadležnosti:
 - 1) priprema i dvotrećinskom većinom glasova usvaja Statut Općine, donosi odluke o upravljanju i raspolaganju imovinom Općine, te razrješava predsjedavajućeg i zamjenike predsjedavajućeg Općinskog vijeća Stari Grad Sarajevo;
 - 2) donosi Poslovník o svom radu
 - 3) usvaja budžet i izvještaj o izvršenju budžeta Općine;
 - 4) donosi razvojne, prostorne i urbanističke planove i programe, te provedbene planove, uključujući zoniranje;
 - 5) donosi propise o porezima, taksama, naknadama i doprinosima Općine u skladu sa zakonom;
 - 6) donosi odluke o zaduživanju Općine;
 - 7) donosi programe uređenja građevinskog zemljišta;
 - 8) donosi plan korištenja javnih površina;
 - 9) donosi odluke o organizaciji mjesne samouprave i nazivima ulica, trgova i dijelova naseljenih mjesta;
 - 10) donosi Odluku o organizaciji i djelokrugu rada službi Općine;
 - 11) daje saglasnost na Pravilnik organizaciji i sistematizaciji radnih mjesta u Općini;
 - 12) donosi odluke o udruživanju Općine u savez i druge oblike organiziranja;
 - 13) donosi odluke o obilježjima i proglašenju dana Općine;
 - 14) donosi odluke o nagradama i priznanjima Općine
 - 15) bira predsjedavajućeg i zamjenike predsjedavajućeg vijeća;
 - 16) donosi odluke o raspisivanju referenduma;
 - 17) razmatra godišnje izvještaje o provođenju politike Općine i aktivnostima načelnika
 - 18) osniva preduzeća i ustanove za obavljanje poslova od interesa za Općinu
 - 19) obavlja i druge poslove utvrđene Zakonom i Statutom.
- (2) Članovi vijeća su odgovorni za ustavnost i zakonitost akata koje Općinsko vijeće donosi u okviru svojih nadležnosti.

Član 27.
(Javnost rada Općinskog vijeća i Općinskog načelnika)

- (1) Rad Općinskog vijeća, Općinskog načelnika i upravnih tijela Općine je javan.
- (2) Javnost rada Općinskog vijeća osigurava se javnim održavanjem sjednica, prenosom uživo putem socijalnih medija, te objavljivanjem općih i drugih akata Općinskog vijeća u "Službenim novinama Kantona Sarajevo", na internet stranici Općine i oglasnoj ploči.
- (3) Javnost rada Općinskog načelnika osigurava se održavanjem konferencija za medije te objavljivanjem općih akata i drugih akata općinskog načelnika u „Službenim novinama Kantona Sarajevo“, oglasnoj ploči i na internet stranici Općine.
- (4) Javnost rada upravnih tijela Općine osigurava se objavljivanjem informacija na internet stranici Općine, te drugim oblicima javnog saopštavanja.
- (5) Izuzetno, Općinsko vijeće može Poslovníkom, u skladu sa zakonom, propisati slućajeve u kojima se javnost isključuje.

Član 28.
(Odlučivanje Općinskog vijeća)

Općinsko vijeće svoje odluke donosi natpolovičnom većinom glasova od ukupnog broja izabaranih općinskih vijećnika, na način utvrđen Poslovníkom i ovim Statutom, izuzev odluke o usvajanju Statuta, odluke o osnivanju mjesne zajednice, upravljanje i raspolaganje imovinom, razrješenje predsjedavajućeg i zamjenika predsjedavajućeg Općinskog vijeća Stari Grad Sarajevo, koji se donose dvotrećinskom većinom glasova izabranih općinskih vijećnika.

Član 29.
(Status Predsjedavajućeg i zamjenika predsjedavajućeg)

- (1) Predsjedavajući i zamjenici predsjedavajućeg Općinskog vijeća mogu svoju dužnost obavljati profesionalno u skladu sa odlukom Općinskog vijeća, te će svoju dužnost obavljati sa naknadom, a što se utvrđuje Odlukom Općinskog vijeća.
- (2) Predsjedavajući i zamjenici predsjedavajućeg Općinskog vijeća mogu svoju dužnost obavljati neprofesionalno uz naknadu ili bez novćane naknade po tom osnovu.
- (3) Ukoliko Predsjedavajući i zamjenici predsjedavajućeg Općinskog vijeća žele svoju dužnost obavljati bez naknade, potpisanu i ovjerenu izjavu o obavljanju svoje dužnosti bez naknade po tom osnovu, dostavljaju Općinskom vijeću.
- (4) Predsjedavajući i zamjenici predsjedavajućeg Općinskog vijeća mogu podnijeti ostavku, biti smijenjeni sa dužnosti prije isteka mandata odlukom Općinskog vijeća.

Član 30.
(Stalna i povremena tijela Općinskog vijeća)

- (1) Općinsko vijeće može osnovati i imenovati: komisije, savjete, odbore, radne grupe i druga stalna i povremena radna tijela, ćiji sastav, broj ćlanova, djelokrug i način rada se utvrđuje Poslovníkom o radu Općinskog vijeća, odnosno posebnom Odlukom o osnivanju radnog tijela.
- (2) Članovi radnih tijela Općinskog vijeća imaju pravo na naknadu za svoj rad, utvrđenu odlukom Općinskog vijeća u skladu sa zakonom.

- (3) Članovi radnih tijela Općinskog vijeća svoju dužnost mogu obavljati bez naknade po tom osnovu, potpisanu i ovjerenu izjavu o obavljanju svoje dužnosti bez naknade, dostavljaju Općinskom vijeću.

Član 31.
(Općinski vijećnik)

- (1) Općinski vijećnik (u daljem tekstu: vijećnik) je predstavnik građana u Općinskom vijeću, sa mandatom, pravima i obavezama propisanim Ustavom, zakonom i ovim Statutom.
- (2) Vijećnik svoje dužnosti vrši prema svom slobodnom uvjerenju.
- (3) Vijećnik se u javnom životu treba ponašati na primjeren i etičan način u skladu sa Etičkim kodeksom, te svoje dužnosti obavljati savjesno i isključivo u interesu i za dobrobit građana i Općine.
- (4) Prava i dužnosti općinskih vijećnika utvrđuju se Poslovníkom o radu Općinskog vijeća.

VI – OPĆINSKI NAČELNIK

Član 32.
(Općinski načelnik)

- (1) Općinski načelnik je izvršni organ Općine.
- (2) Općinski načelnik svoju dužnost obavlja profesionalno i za to vrijeme ostvaruje pravo na plaću, kao i druga prava po osnovu rada.
- (3) Općinski načelnik se bira neposredno na način i po postupku utvrđenim zakonom.
- (4) Općinski načelnik vrši dužnost za vrijeme koje je izabran u skladu sa Izbornim zakonom Bosne i Hercegovine, kao i odredbama Zakona o izboru, prestanku mandata, opozivu i zamjeni načelnika Općina u Federaciji Bosne i Hercegovine.

Član 33.
(Nadležnost Općinskog načelnika)

Općinski načelnik u okviru svoje nadležnosti:

- 1) predstavlja i zastupa Općinu;
- 2) donosi akte iz svoje nadležnosti;
- 3) izrađuje i vijeću na usvajanje podnosi nacrt i prijedlog budžeta, ekonomske planove, razvojne planove, investicione programe, prostorne i urbanističke planove i ostale planske i regulatorne dokumente koji se odnose na korištenje i upravljanje zemljištem, uključujući zoniranje i korištenje javnog zemljišta;
- 4) predlaže odluke i druge opće akte vijeću;
- 5) provodi politiku Općine u skladu sa odlukama vijeća, izvršava budžet Općine i osigurava primjenu odluka i drugih akata vijeća;
- 6) izvršava zakone i druge propise čije je izvršenje povjereno Općini;
- 7) donosi pravilnik o unutrašnjoj organizaciji i sistematizaciji radnih mjesta službi uprave uz saglasnost Općinskog vijeća;

- 8) realizira saradnju Općine sa drugim općinama, gradovima, savezima, međunarodnim i drugim organizacijama u skladu sa odlukama i zaključcima vijeća i njegovih radnih tijela;
- 9) podnosi izvještaj vijeću o ostvarivanju politike Općine i svojim aktivnostima.

Član 34.
(Vršenje poslova)

- (1) Poslove iz člana 33. ovog Statuta Općinski načelnik vrši samostalno i putem službi za upravu u sastavu jedinstvenog organa uprave i ostalih općinskih službi.
- (2) Općinski načelnik odgovara za ustavnost i zakonitost akata koje donosi, odnosno predlaže Općinskom vijeću.

Član 35.
(Opoziv Općinskog načelnika)

- (1) Inicijativa sa obrazloženjem za pokretanje postupka opoziva Općinskog načelnika se može pokrenuti od strane Općinskog vijeća putem 1/3 (jedne trećine) vijećnika Općinskog vijeća ili 10% registriranih birača na području Općine.
- (2) Općinsko vijeće je dužno sve inicijative za pokretanje postupka opoziva Općinskog načelnika iz stava 1. ovog člana staviti na dnevni red na prvoj idućoj sjednici Općinskog vijeća.
- (3) Odluka o pokretanju postupka opoziva Općinskog načelnika se donosi većinom glasova od ukupnog broja vijećnika u Općinskom vijeću.
- (4) U slučaju prihvatanja inicijative Općinsko vijeće je dužno donijeti Odluku o pokretanju postupka opoziva Općinskog načelnika u roku od 30 dana.
- (5) Ako Općinsko vijeće donese Odluku o prihvatanju inicijative za pokretanje postupka opoziva Općinskog načelnika sprovodi se postupak u kojem građani odlučuju neposrednim tajnim glasanjem.
- (6) Mandat Općinskog načelnika prestaje ukoliko nadpolovična većina građana koji su glasali donese odluku o opozivu Općinskog načelnika.
- (7) Odluka građana je obavezujuća za Općinsko vijeće i Općinskog načelnika.
- (8) Nakon izglasavanja opoziva novi izbori za Općinskog načelnika raspisuju se u roku od 60 dana.

Član 36.
(Privremena sprječnost)

- (1) Načelnika za vrijeme privremene odsutnosti ili spriječenosti zamjenjuje dužnosnik ili djelatnik općinskog organa uprave, kojeg on ovlasti.
- (2) U slučaju iz stava (1), ako načelnik nije odredio ko ga mijenja, izbor će izvršiti Općinsko vijeće, iz reda općinskih dužnosnika ili djelatnika.
- (3) Dužnost načelnika, u slučaju prestanka mandata i u slučaju opoziva, do ponovnog izbora načelnika, vrši osoba izabrana od Općinskog vijeća, nadpolovičnom većinom od ukupnog broja članova Općinskog vijeća.

VII – MEĐUSOBNI ODNOSI ORGANA OPĆINE

Član 37.

(Međusobni odnosi Općinskog vijeća i Općinskog načelnika)

Međusobni odnosi Općinskog vijeća i Općinskog načelnika zasnivaju se na principima međusobnog uvažavanja i saradnje, uz pojedinačnu odgovornost za ostvarivanje vlastitih nadležnosti i zajedničku odgovornost za funkcioniranje i razvoj Općine.

Član 38.

(Izvještaj Općinskog načelnika)

Općinski načelnik podnosi izvještaj Općinskom vijeću u ostvarivanju politike Općine i svojim aktivnostima i dužan je odgovarati na zastupnička vijećnička pitanja i inicijative, u roku od 15 dana od dana prijema istih.

Član 39.

(Razmatranje prijedloga akata)

Općinsko vijeće je dužno razmotriti prijedlog odluke, odnosno informaciju koju podnese Općinski načelnik i o tome se izjasniti u roku od 15 dana.

Član 40.

(Preispitivanje akata)

- (1) Općinsko vijeće, odnosno Općinski načelnik može u roku od tri dana nakon donošenja odluke ili drugog akta zatražiti da Općinsko vijeće, odnosno Općinski načelnik preispita odluku ili akt koji smatra neustavnim ili nezakonitim, ili čije izvršenje bi moglo proizvesti nepopravljivu štetu po interese ili imovinu Općine.
- (2) U slučaju iz stava 1. ovog člana nadležni organ dužan je preispitati svoju odluku, odnosno akt u roku od 30 dana i obavijestiti Općinsko vijeće odnosno Općinskog načelnika o svojoj odluci, do kada se taj akt neće primjenjivati, odnosno izvršavati.
- (3) Kada Općinsko vijeće, odnosno Općinski načelnik potvrdi svoju odluku, odnosno akt, Općinsko vijeće, odnosno Općinski načelnik može u roku od 15 dana pokrenuti postupak preispitivanja odluke, odnosno akta pred nadležnim organom u skladu sa Ustavom i zakonom.

Član 41.

(Usvajanje Budžeta)

- (1) Općinski načelnik je dužan Općinskom vijeću dostaviti prijedlog budžeta Općine u roku utvrđenom zakonom i budžetskim kalendarom.
- (2) Priprema, usvajanje i izvršenje budžeta Općine vršit će se u skladu sa procedurama i principima utvrđenim zakonom.
- (3) Općinsko vijeće većinom od ukupnog broja vijećnika usvaja budžet u roku predviđenom budžetskim kalendarom.
- (4) Do usvajanja novog budžeta, najduže 90 dana nakon početka budžetske godine, finansiranje Općine ne može biti veće od realizacije budžeta za isti period prethodne godine umanjenog za kapitalne investicije, izuzevši kapitalne investicije čija se realizacija nastavlja u tekućoj godini.

- (5) Ukoliko vijeće ne usvoji budžet u roku od 90 dana od početka budžetske godine, načelnik proglašava budžet.
- (6) Budžet stupa na snagu nakon objavljivanja u „Službenim novinama Kantona Sarajevo“, oglasnoj ploči i na internetskoj stranici Općine.
- (7) Ukoliko načelnik, vijeće ili jedna trećina vijećnika smatraju da usvojeni budžet u određenoj poziciji može ugroziti funkcioniranje Općine, mogu u roku od sedam dana tražiti arbitražu.
- (8) Arbitražu će u roku od mjesec dana vršiti tijelo koje će formirati Federalno ministarstvo finansija, čiji je nalaz obavezujući.
- (9) Arbitražno tijelo činit će predstavnici Federalnog ministarstva finansija, kantonalnog ministarstva finansija, općinskog vijeća i općinskog načelnika, nezavisni ekspert iz oblasti finansija i predstavnik Saveza općina i gradova Federacije Bosne i Hercegovine.
- (10) Do donošenja arbitražne odluke budžet se izvršava.

VIII – SLUŽBE ZA UPRAVU I JAVNE SLUŽBE

Član 42. (Službe za upravu)

- (1) Za obavljanje poslova iz svoje nadležnosti, poslova lokalne samouprave i upravnih poslova iz djelokruga Općine, kao upravnih poslova prenesenih od Federacije Bosne i Hercegovine i Kantona Sarajevo, organizuju se općinske službe za upravu Odlukom Općinskog vijeća.
- (2) Općinski načelnik zajedno sa službama čini jedinstveni organ uprave.

Član 43. (Javne službe)

- (1) U okviru samoupravnog djelokruga Općine osigurava se obavljanje javnih službi osnivanjem javnih ustanova i preduzeća u cilju nesmetanog obavljanja djelatnosti u javnom interesu, u skladu sa zakonom.
- (2) Općinsko vijeće može posebnom odlukom osnovati javno preduzeće za obavljanje poslova u oblasti komunalnih djelatnosti, koje je obavezno da osigura trajno i kvalitetno održavanje lokalnih vodovoda i kanalizacione mreže, održavanje i čišćenje javnih zelenih površina, održavanje dječijih i sportskih igrališta, spomen obilježja, upravljanje parking prostorima i obavljanje drugih djelatnosti za potrebe Općine u skladu sa zakonom.
- (3) Općinsko vijeće može posebnom odlukom osnovati javne ustanove, radi ostvarivanja javnog interesa u oblasti nauke, kulture, sporta, te drugih oblasti od posebnog značaja za Općinu.
- (4) Upravni odbor javnih ustanova i skupštine javnih preduzeća dužni su najmanje jednom godišnje podnijeti izvještaj o svom radu i radu navedenih pravnih subjekata Općinskom vijeću na razmatranje i usvajanje.
- (5) Upravni odbori javnih ustanova i skupštine javnih preduzeća dužni su Općinskom vijeću, u roku od 30 dana od usvojene izmjene dostaviti informaciju o izmjenama pravila, pravilnika o radu i pravilnika o unutrašnjoj organizaciji.

IX- MJESNA SAMOUPRAVA

Član 44. (Mjesna samouprava)

Mjesna samouprava jedinice lokalne samouprave ostvaruje se u mjesnoj zajednici, kao obaveznom obliku mjesne samouprave koju osniva Općinsko vijeće.

Član 45. (Osnivanje mjesne zajednice)

- (1) Na području Općine osnivaju se mjesne zajednice kao obavezan oblik mjesne samouprave, putem kojih građani sudjeluju u odlučivanju o poslovima iz samoupravnog djelokruga i lokalnim poslovima, koji neposredno i svakodnevno utiču na njihov život i rad.
- (2) Mjesna zajednica se osniva za jedno naseljeno mjesto, više međusobno povezanih manjih naselja ili za veći dio naselja koji, u odnosu na ostale dijelove čini zasebnu razgraničenu cjelinu.
- (3) Mjesna zajednica se osniva Odlukom Općinskog vijeća, kojom se, između ostalog, određuje:
 - naziv;
 - sjedište;
 - područje mjesne zajednice;
 - mjesna područja, odnosno druge dijelove mjesne zajednice;
 - druga pitanja u vezi sa ostvarivanjem mjesne samouprave.
- (4) Odluka iz stava (2) ovog člana donosi se ukoliko za usvajanje iste glasa dvije trećine vijećnika, koji čine Općinsko vijeće.

Član 46. (Postupak osnivanja mjesne zajednice)

- (1) Inicijativu i prijedlog za osnivanje mjesne zajednice mogu pokrenuti građani, udruženja građana sa područja naseljenog mjesta za čije se područje predlaže osnivanje nove mjesne zajednice, Općinsko vijeće ili Općinski načelnik.
- (2) Općinsko vijeće odlučuje o osnivanju nove, promjeni područja i ukidanju mjesne zajednice na svom području.
- (3) Građani, njihove organizacije i udruženja, inicijativu za osnivanje mjesne zajednice na području Općine na kojoj imaju prebivalište odnosno sjedište podnose Općinskom vijeću na razmatranje uz svoje mišljenje, kao i Općinskom načelniku.
- (4) Inicijativa za osnivanje mjesne zajednice mora sadržavati podatke o području naseljenog mjesta za koje se traži osnivanje mjesne zajednice, kao i naziv i sjedište mjesne zajednice, te obrazloženje sa razlozima za podnošenje prijedloga odnosno inicijative, kao i nacrt Statuta.
- (5) Ako građani podnose inicijativu, svojim potpisom mora biti podržana od najmanje 10% birača upisanih u birački spisak sa područja postojeće mjesne zajednice.

Član 47.
(Status mjesne zajednice)

Mjesna zajednica ima svojstvo pravnog lica u pogledu prava i obaveza utvrđenih Statutom Općine i Zakonom.

Član 48.
(Nadležnost mjesne zajednice)

- (1) Građani u mjesnoj zajednici putem organa mjesne zajednice odlučuju o poslovima značajnim za život i rad na području mjesne zajednice, a naročito:
 - Pokreću i učestvuju u javnoj raspravi kod pripreme i donošenja urbanističkih planova na području mjesne zajednice, pokreću inicijative, daju mišljenja i učestvuju u izgradnji komunalnih objekata i objekata u općoj upotrebi;
 - Pokreću i učestvuju u raspravama o inicijativama i aktivnostima za razvoj privrede i društvenih djelatnosti;
 - Brinu o zaštiti osoba kojima je potrebna pomoć i u tu svrhu pokreću saradnju sa stručnim organima u oblasti socijalne zaštite;
 - Staraju se o razvoju kulture i sporta i stvaraju uvjete za dostupnost ustanova i objekata kulture i sporta svim građanima, pogotovo mladima;
 - Stvaraju uvjete i poduzimaju mjere za očuvanje i zaštitu prirodnih i radom ostvarenih vrijednosti čovjekove sredine;
 - Drugim poslovima utvrđenim Statutom mjesnih zajednica, vodeći računa o vrsti i obimu potreba, raspoloživim sredstvima, kao i interesima građana u cjelini.
- (2) Odlukom Općine može se mjesnoj zajednici povjeriti obavljanje pojedinih poslova iz samostalnog djelokruga Općine, koji su od neposrednog i svakodnevnog utjecaja na život i rad građana na području mjesne zajednice.
- (3) Sredstva za obavljanje poslova iz prethodnog stava obezbjeđuju se iz budžeta Općine.

Član 49.
(Organi mjesne zajednice)

- (1) Organi mjesne zajednice su: zbor građana, savjet i drugi organi utvrđeni pravilima mjesne zajednice.
- (2) Organi mjesnih zajednica bit će obavezno konsultovani u vezi pitanja o kojima Općinsko vijeće odlučuje dvotrećinskom većinom i u postupku donošenja planova jedinice lokalne samouprave, kao i o drugim pitanjima o kojima je zatražena konsultacija od Općinskog vijeća ili Općinskog načelnika.
- (3) Organi mjesne zajednice mogu davati inicijative o pitanjima iz nadležnosti mjesne zajednice, Općine i institucija koje vrše javne ovlasti.

Član 50.
(Statut mjesne zajednice)

Statutom mjesne zajednice, u skladu sa Statutom Općine i aktom o osnivanju utvrđuju se

poslovi koje obavlja mjesna zajednica, organi, kao i postupak izbora, organizacija i rad organa, način odlučivanja i druga pitanja od značaja za rad mjesne zajednice.

Član 51. **(Zbor građana)**

- (1) Zbor građana mjesne zajednice čine svi građani nastanjeni na području mjesne zajednice.
- (2) Zborom građana predsjedava predsjednik.
- (3) Zbor građana bira odbor od tri do pet članova koji je dužan pripremiti izbore za Savjet mjesne zajednice, najkasnije u roku od 60 dana od dana osnivanja mjesne zajednice.
- (4) Odlukom o sazivanju zbora građana određuju se pitanja o kojima će se tražiti mišljenje od zbora građana, područje za koje se saziva, te vrijeme u kojem se mišljenje treba dostaviti.
- (5) Odluka o sazivanju mjesnog zbora građana u mjesnoj zajednici mora sadržavati:
 - naziv mjesne zajednice,
 - tijelo koje saziva zbor građana,
 - područje mjesne zajednice za koje se saziva,
 - vrijeme i prostor održavanja zbora građana,
 - dnevni red zbora građana.
- (6) Odluka o sazivanju zbora građana za područje mjesne zajednice objavljuje se na Oglasnoj ploči mjesne zajednice i internet stranici Općine, najmanje 7 (sedam) dana prije dana održavanja zbora građana.

Član 52. **(Nadležnost Zbora građana)**

- (1) Zbor građana pokreće postupak za prestanak rada mjesne zajednice, utvrđuje godišnji program aktivnosti Savjeta mjesne zajednice, usvaja izvještaj o radu Savjeta i odlučuje o drugim pitanjima, koja nisu u nadležnosti drugih organa mjesne zajednice.
- (2) Zbor građana se konsultuje o pitanjima o kojima odlučuje Savjet mjesne zajednice, kao i o pitanjima o kojima odlučuje Općinsko vijeće.
- (3) Zbor građana može davati inicijative o pitanjima iz nadležnosti mjesne zajednice.
- (4) Ako je za raspravu na zboru građana nužno upoznavanje građana s prijedlogom nekog akta, sazivač zbora građana dužan je građanima omogućiti uvid u pisani materijal određujući mjesto i vrijeme odnosno internet stranicu na kojoj će materijal biti objavljen, a što mora biti naznačeno u odluci o sazivanju zbora građana.
- (5) Zbor građana kojeg saziva savjet mjesne zajednice predsjedava, predsjednik savjeta mjesne zajednice ili član savjeta mjesne zajednice kojeg za to odredi savjet.
- (6) Općinsko vijeće može tražiti mišljenje od zbora građana mjesne zajednice o prijedlogu općeg akta, kao i o drugim pitanjima iz djelokruga Općine određenim zakonom i ovim Statutom.
- (7) Odluka donesena na zboru građana obavezujuća je za Savjet mjesne zajednice
- (8) Savjet mjesne zajednice dužan je izvjestiti zbor građana o tome što je poduzeto u vezi sa njihovim mišljenjem i prijedlozima.
- (9) Inicijativa zbora građana mjesne zajednice, koju je podržalo 5% ukupnog broja građana upisanih u birački spisak, obavezuje savjet mjesne zajednice i organe Općine da se o njoj izjasne.

Član 53.
(Mjesto i način održavanja Zbora građana)

- (1) Zbor građana se održava jedinstveno za mjesnu zajednicu ili po djelovima za mjesna područja.
- (2) Odluku o načinu održavanja zbora građana donosi Savjet mjesne zajednice u skladu sa Statutom mjesne zajednice.

Član 54.
(Savjet mjesne zajednice)

- (1) Savjet mjesne zajednice je izvršno tijelo mjesne zajednice. Broj članova savjeta ne može biti manji od pet, niti veći od deset, ovisno od veličine, razvijenosti i broja stanovnika mjesne zajednice.
- (2) Savjet mjesne zajednice biraju građani s područja mjesne zajednice, koji imaju biračko pravo, neposrednim i tajnim glasanjem.
- (3) Predsjednika savjeta bira Savjet mjesne zajednice.
- (4) Mandat članova Savjeta traje četiri godine.

Član 55.
(Nadležnost Savjeta mjesne zajednice)

- (1) Savjet mjesne zajednice:
 1. Donosi statut mjesne zajednice uz saglasnost Općinskog vijeća;
 2. Donosi plan malih komunalnih akcija mjesne zajednice, koji je sastavni dio plana komunalnih aktivnosti Općine; koji su od interesa za pojedini dio mjesne zajednice ili mjesnu zajednicu u cjelini i utvrđuje prioritete u njihovoj realizaciji;
 3. Donosi plan potreba za aktivnostima, programima, projektima unapređenja kvaliteta život;
 4. Donosi program rada i izvještaj o radu;
 5. Bira predsjednika savjeta;
 6. Saziva mjesne zborove građana;
 7. Inicira postupak za izmjenu područja i naziva mjesne zajednice;
 8. Sudjeluje u provođenju civilne zaštite na svom području;
 9. Sarađuje sa drugim mjesnim zajednicama na području Općine, posebno sa susjedima;
 10. Sarađuje sa udruženjima na svom području u pitanjima od interesa za građane sa područja mjesne zajednice;
 11. Podnosi izvještaj o svom radu Općinskom vijeću i za svoj rad odgovara Općinskom vijeću i zboru građana mjesne zajednice;
 12. Obavlja i druge poslove utvrđene zakonom, općinskim odlukama i drugim propisima.
- (2) Savjet mjesne zajednice može sazivati zbor građana radi raspravljanja o određenim potrebama i interesima građana, te davanja prijedloga za rješavanje pitanja od značaja za mjesnu zajednicu.

Član 56.
(Pravila mjesne zajednice)

Pravilima mjesne zajednice, u skladu sa Zakonom i Statutom Općine, bliže se uređuju: sadržaj poslova mjesne zajednice, organi mjesne zajednice, način njihovog izbora i opoziva, njihova nadležnost, način finansiranja mjesne zajednice, postupak organiziranja izbora za savjet mjesne zajednice, odnos prema Općini i njenim organima, odnos prema pravnim licima na području mjesne zajednice i druga pitanja značajna za rad mjesne zajednice.

Član 57.
(Predsjednik Savjeta mjesne zajednice)

- (1) Predsjednik savjeta predstavlja Savjet, saziva sjednice Savjeta i predsjedava im, izvršava program rada i finansijski plan, obavlja i druge poslove u skladu sa pravilima mjesne zajednice.
- (2) Predsjednik savjeta za svoj rad odgovara Savjetu, a Općinskom načelniku za obavljanje onih poslova koji su iz samoupravnog djelokruga Općine prenijeti na mjesnu zajednicu.

Član 58.
(Sastav i broj članova Savjeta mjesne zajednice)

- (1) Broj članova mjesne zajednice utvrđuje se Statutom mjesne zajednice, prema broju građana upisanih u birački spisak i nastanjenih na području mjesne zajednice, uz obavezu da svako mjesno područje mora biti zastupljeno u Savjetu najmanje jednim članom.
- (2) Broj članova Savjeta mjesne zajednice ne može biti manji od pet niti veći od devet, u zavisnosti od veličine, razvijenosti i broja stanovnika mjesne zajednice, a što se detaljno uređuje Statutom mjesne zajednice.

Član 59.
(Sredstva za rad mjesne zajednice)

Sredstva za rad mjesne zajednice osiguravaju se u Budžetu Općine u skladu sa zakonom.

Član 60.
(Nadzor)

- (1) Nadzor nad zakonitošću rada organa mjesne zajednice obavlja Općinski načelnik.
- (2) Općinski načelnik ima pravo predložiti Općinskom vijeću da raspusti Savjet mjesne zajednice, ako on u svom radu učestalo krši pravila mjesne zajednice i ne izvršava povjerene poslove.

X – ZAŠTITA PRAVA GRAĐANA I NEPOSREDNO UČESTVOVANJE GRAĐANA U ODLUČIVANJU U JEDINICAMA LOKALNE SAMOUPRAVE

Član 61. (Pravo građana na lokalnu samoupravu)

Radi ostvarivanja Ustavom, Zakonom i Statutom utvrđenih prava građana, u Općini se osigurava zaštita prava građana na lokalnu samoupravu.

Član 62. (Inicijativa za ocjenu zakonitosti i ustavnosti propisa i akata)

Svaki građanin, organi Općine, mjesne zajednice, političke organizacije, udruženja i druge organizacije mogu pokrenuti inicijativu za ocjenu ustavnosti i zakonitosti propisa i akata organa kojima se povređuju prava građana na lokalnu samoupravu.

Član 63. (Zaštita prava građana na lokalnu samoupravu)

Zaštita prava građana na lokalnu samoupravu obuhvata:

1. Prava građana da putem referendumu i drugih oblika odlučivanja ličnim izjašnjavanjem i preko slobodno izabranih predstavnika, odlučuju o poslovima od lokalnog značaja;
2. Pravo građana na samoorganiziranje, u skladu sa zakonom;
3. Pravo građana da budu konsultovani o svim pitanjima, kada se Zakonom uređuju pitanja kojima se regulišu prava i obaveze Općine;
4. Prava građana da na zborovima građana razmatraju i daju mišljenja u slučajevima kada Federacija Bosne i Hercegovine ili Kanton Sarajevo žele prenijeti pojedine poslove iz okvira svoje nadležnosti na Općinu.

Član 64. (Oblici neposrednog odlučivanja građana)

- (1) Građani neposredno odlučuju o pitanjima iz nadležnosti organa jedinica lokalne samouprave putem referendumu, građanske inicijative, predstavki, prijedloga i pritužbi i drugih oblika neposrednog izjašnjavanja.
- (2) Svoje prijedloge građani podnose putem građanske inicijative, udruženja građana, nevladinih organizacija, kao i putem drugih mehanizama participativne demokratije koji nisu zabranjeni zakonom.

Član 65.
(Referendum)

- (1) Referendum se može raspisati radi odlučivanja o prijedlogu o promjeni Statuta Općine, o prijedlogu općeg akta ili drugih pitanja jedinica lokalne samouprave, kao i o drugim pitanjima određenim zakonom i ovim Statutom.
- (2) Referendum na osnovu zakona i ovog Statuta raspisuje Općinsko vijeće na prijedlog jedne trećine članova Općinskog vijeća, na prijedlog Općinskog načelnika, 3% od ukupnog broja građana upisanih u birački spisak ili na prijedlog jedne petine mjesnih zajednica na području Općine.
- (3) Općinsko vijeće dužno je izjasniti se o podnesenom prijedlogu za raspisivanje referenduma, te ukoliko ga prihvati, donosi odluku o raspisivanju referenduma u roku od 60 dana od dana podnošenja prijedloga.

Član 66.
(Odluka o raspisivanju referenduma)

- (1) Odlukom o raspisivanju referenduma određuju se pitanja o kojima građani treba da se izjasne na referendumu, određuje datum održavanja referenduma, kao i područje na kojem će se održati referendum.
- (2) Građani se o pitanjima, koja se postavljaju na referendumu izjašnjavaju sa „ZA“ ili „PROTIV“.
- (3) Referendum provodi Komisija za provođenje referenduma koju imenuje Općinsko vijeće.
- (4) Sastav Komisije, djelokrug poslova, kao i ostale odredbe o provođenju postupka referenduma utvrđuje Općinsko vijeće u skladu sa zakonom.
- (5) Komisija utvrđuje rezultate referenduma i podnosi izvještaj o rezultatima referenduma Općinskom vijeću.

Član 67.
(Pravo odlučivanja)

- (1) Pravo odlučivanja na referendumu imaju građani koji imaju prebivalište na području Općine i koji su upisani u birački spisak.
- (2) Prijedlog po kojem su se građani izjašnjavali na referendumu smatra se prihvaćenim ako se za prijedlog izjasnila nadpolovična većina građana koji su glasali.
- (3) Odluka donesena na referendumu obavezna je za Općinsko vijeće, Općinskog načelnika i građane s tim što ista podliježe upravnom nadzoru nadležnih organa u skladu sa zakonom.
- (4) Prijedlog koji na referendumu nije prihvaćen, ne može se ponovo iznijeti na referendum prije isteka roka od 1 (jedne) godine od dana održavanja referenduma.

Član 68.
(Građanska inicijativa)

- (1) Građanskom inicijativom građani predlažu Općinskom vijeću ili Općinskom načelniku donošenje odnosno izmjenu određenog akta ili rješavanje određenog pitanja iz njihovog djelokruga.

- (2) Građanska inicijativa mora biti svojeručno potpisana od podnosioca sa osnovnim ličnim podacima odnosno koju je svojim potpisom uz navođenje jedinstvenog matičnog broja podržalo najmanje 5% birača upisanih u centralni birački spisak.
- (3) Ukoliko su za realizaciju građanske inicijative potrebna finansijska sredstva, inicijativa mora sadržavati prijedlog načina njihovog osiguranja.

Član 69.
(Oblici građanske inicijative)

Građanska inicijativa se može podnijeti u obliku:

1. Općeg prijedloga za donošenje, izmjenu, dopunu ili prestanak važenja pojedinog akta ili za rješavanje određenog pitanja, s tim da se iz prijedloga jasno vide pravci promjena, odnosno rješenja koje se predlaže;
2. Konkretnog prijedloga za donošenje, izmjenu ili ukidanje pojedinog akta, sa izrađenim prijedlogom pravnog akta i obrazloženjem. Kad je prijedlog građanske inicijative akt kojim se predlaže izmjena ili dopuna određenog pravnog akta, izmjene moraju biti pripremljene tako da su usklađene sa dijelom pravnog akta koji se ne mjenja i ostaje na snazi i da zajedno čine pravno i logički usklađenu cijelinu.

Član 70.
(Razmatranje građanske inicijative)

- (1) Općinsko vijeće dužno je razmotriti građansku inicijativu ukoliko ona sadrži elemente propisane članom 66. ovog Statuta najkasnije u roku od 60 dana od dana prijema građanske inicijative i odluku u pisanom obliku dostaviti podnosiocu građanske inicijative odmah po njenom donošenju.
- (2) Općinski načelnik dužan je razmotriti građansku inicijativu ukoliko ona sadrži sve elemente propisane članom 66. ovog Statuta i podnosiocu inicijative u pisanom obliku odgovoriti u roku 30 (trideset) dana od dana prijema građanske inicijative.

Član 71.
(Predstavke, prijedlozi i pritužbe građana)

- (1) Građani i pravna lica, na način i po postupku propisanim Zakonom o postupanju sa predstavkama i prijedlozima, imaju pravo Općinskom načelniku i Općinskom vijeću podnositi predstavke i prijedloge koji se odnose na rad tih organa.
- (2) Rok za odgovor na podnesene predstavke i prijedloge je 30 (trideset) dana od dana podnošenja.

Član 72.
(Drugi oblici djelovanja)

Općina s ciljem unapređenja aktivnog i efikasnog učestvovanja građana u odlučivanju, te transparentnosti u vršenju administrativnih poslova i u procesima donošenja određenih odluka, promovira razne oblike savjetovanja i konsultacija putem:

- Zbora građana;
- Organizacija korisnika javnih usluga;

- Javnog poziva građanima na konsultacije u postupku donošenja odluka;
- Javnog poziva građanima da prezentiraju prijedloge i zapažanja u odnosu na mjere i rad općinskih organa;
- Provođenjem ispitivanja javnog mijenja putem anketa;
- Javnog informisanja;
- Organizovanjem konsultativnih sastanaka sa asocijacijama i udruženjima građana;
- Na druge prigodne načine

XI – FINANSIRANJE I IMOVINA OPĆINE

Član 73. (Imovina Općine)

Općina ima pravo na pokretnu i nepokretnu imovinu i na odgovarajuće izvore finansiranja, kojima slobodno raspolaže u okviru svojih ovlasti, kao i na sredstva za obavljanje delegiranih prenesenih poslova iz okvira prava i dužnosti viših tijela vlasti.

Član 74. (Finansiranje Općine)

- (1) Općina ima pravo na odgovarajuće sopstvene finansijske izvore, kojima Općina može slobodno raspolagati u okviru nadležnosti utvrđene Zakonom.
- (2) Jedan dio finansijskih sredstava Općina će ostvariti od lokalnih taksi i naknada čiju stopu Općina utvrđuje u okviru zakona.

Član 75. (Upravljanje imovinom)

- (1) Imovinom u vlasništvu Općine mora se upravljati u skladu sa zakonom i drugim propisima, te u interesu lokalnog stanovništva i s pažnjom dobrog domaćina.
- (2) Postupak utvrđivanja i prenosa vlasništva i rješavanja međusobnih potraživanja, u vezi s prenosom vlasništva kao i druga imovinska potraživanja uređuju se zakonom.
- (3) Općinsko vijeće odlučuje o pribavljanju, korištenju, upravljanju i raspolaganju imovinom Općine.

Član 76. (Prihodi Općine)

- (1) Općini pripadaju vlastiti prihodi, i to:
 - Porezi koje Općina samostalno određuje u skladu sa zakonom;
 - Lokalne takse i naknade čije iznose utvrđuje Općinsko vijeće u skladu sa zakonom;
 - Kazne i kamate u skladu sa zakonom;
 - Prihod od upotrebe i prodaje imovine;
 - Prihod od preduzeća i drugih pravnih lica u vlasništvu Općine, kao i prihod koncesija u skladu sa zakonom;
 - Pokloni, nasljedstva, pomoći i donacije;

- Prihodi od samodoprinosu;
 - Prihodi od budžetskih korisnika;
 - Drugi prihodi utvrđeni zakonom i odlukom Općinskog vijeća.
- (2) Općini pripadaju drugi prihodi, kao što su:
- Prihodi od dijeljenja poreza definisanih zakonom;
 - Transferi i grantovi od viših nivoa vlasti;
 - Dug u skladu sa zakonom.

Član 77.
(Zaduživanje Općine)

Općina se može zaduživati i zaključivati ugovore o kreditu, a o čemu odlučuje Općinsko vijeće.

Član 78.
(Budžet Općine)

Općina ima Budžet, u kojem se iskazuju prihodi i rashodi, u skladu sa zakonom.

XII – SARADNJA SA DRUGIM OPĆINAMA

Član 79.
(Saradnja sa drugim općinama)

- (1) U obavljanju poslova, iz samostalnog djelokruga, Općina ostvaruje saradnju sa drugima općinama.
- (2) Saradnja iz prethodnog stava se planira i ostvaruje u poslovima koji su od njihovog zajedničkog interesa.
- (3) Saradnju sa drugim općinama, ostvaruje Općinsko vijeće, odnosno Općinski načelnik, svako po pitanjima iz svog djelokruga.

Član 80.
(Zajednica Općina)

- (1) Općina se može udružiti u zajednicu Općina za određeno područje, u skladu sa zakonom.
- (2) Odluku o udruživanju Općine u zajednicu općina donosi Općinsko vijeće, samostalno ili na prijedlog Općinskog načelnika.
- (3) Odlukom o udruživanju utvrđuju se ciljevi udruživanja, način ostvarivanja tih ciljeva u zajednici općina i druga pitanja od značaja za rad u zajednici općina.
- (4) Općina se može udružiti u Savez općina Federacije Bosne i Hercegovine, o čemu odlučuje Općinsko vijeće.
- (5) Općina može pristupiti međunarodnim udruženjima lokalnih zajednica i saradivati s odgovarajućim lokalnim jedinicama drugih država, u skladu sa zakonom.
- (6) Odluku o pristupanju udruženjima, odnosno ostvarivanju saradnje iz prethodnog stava donosi Općinsko vijeće.

XIII – ODNOS I SARADNJA SA VIŠIM ORGANIMA VLASTI

Član 81.

(Saradnja Općine i Kantona Sarajevo)

- (1) Općina i Kanton Sarajevo djeluju zajednički na partnerskim osnovama, osim u oblasti administrativnog nadzora koji vrše federalne i kantonalne vlasti u pogledu rada organa Općine.
- (2) Općina i Kanton Sarajevo međusobno saraduju radi rješavanja pitanja od zajedničkog interesa, a posebno u postupcima donošenja zakona i drugih akata koji se neposredno tiču Općine i u tom smislu inicijative, mišljenja i prijedloge u ime Općine, mogu podnositi Općinsko vijeće, Općinski načelnik, kao i vijećnici pojedinačno.

Član 82.

(Saradnja Općine i Grada Sarajeva)

Općina će međusobno saradivati sa Gradom Sarajevom i općinama koje čine grad Sarajevo radi obavljanja poslova od zajedničkog interesa u skladu sa Ustavom, zakonom i ovim Statutom, o čemu odlučuje Općinsko vijeće.

Član 83.

(Saradnja u vršenju povjerenih ovlaštenja)

- (1) U vršenju povjerenih ovlaštenja Općina je obavezna primjenjivati uputstva i smjernice koje dobije od federalnih i kantonalnih vlasti u skladu sa zakonom.
- (2) Općina ima pravo da izvršenje prenesenih nadležnosti prilagodi lokalnim uslovima kada to predviđa zakon ili kada za to dobije ovlaštenje federalne ili kantonalne vlasti.
- (3) U postupku donošenja propisa koji se neposredno tiču Općine, federalne i kantonalne vlasti su u obavezi da u najvećoj mogućoj mjeri konsultuju Općinu, a koje konsultovanje se vrši putem Saveza općina.

XIV - PROPISI I DRUGI AKTI OPĆINE

Član 84.

(Akti Općinskog vijeća)

- (1) Općinsko vijeće donosi Statut Općine, budžet, završni račun i izvještaj o izvršenju budžeta, općinske propise (odluke), Poslovnik Općinskog vijeća, rješenja, zaključke, te obavlja i druge poslove utvrđene zakonom i Statutom.
- (2) Poslovnikom Općinskog vijeća bliže se utvrđuje sadržaj, način pripremanja i donošenja općinskih propisa i drugih akata i način njihovog objavljivanja.
- (3) Rješenjem se odlučuje o imenovanju, postavljenju i razrješenjima odnosno smjenjivanju, kao i drugim pojedinačnim pitanjima iz nadležnosti Općinskog vijeća.
- (4) Zaključkom se utvrđuju stavovi o pitanjima od značaja za provođenje utvrđene politike i općinskih propisa iz samoupravnog djelokruga Općine.

- (5) Prilikom pripreme i izrade prijedloga akata iz djelokruga rada službi jedinstvenog općinskog organa uprave Općine, koje donosi Općinski načelnik i Općinsko vijeće, obavezno se primjenjuju Pravila i postupci za izradu zakona i drugih propisa Federacije Bosne i Hercegovine.
- (6) Protiv akata Općinskog vijeća ne može se izjaviti žalba, ali se može pokrenuti upravni spor kod nadležnog suda.

Član 85.

(Akti Općinskog načelnika)

- (1) Općinski načelnik osigurava izvršenje svih zakonskih propisa, kao i propisa Općine, na način i u postupku propisanom zakonom, Statutom i propisima Općinskog vijeća.
- (2) Općinski načelnik u izvršavanju propisa i općih akata iz samoupravnog djelokruga Općine donosi provedbene i opće akte: odluke, uredbе, naredbe, pravilnike, uputstva, rješenja, zaključke, pojedinačne akte kojima se rješava o pravima, obavezama i pravnim interesima fizičkih i pravnih lica u prvom stepenu, o pravima i dužnostima državnih službenika i namještenika iz radnog odnosa, kao i druge akte za čije je donošenje ovlašten zakonom i drugim propisom, Statutom ili odlukom Općinskog vijeća.
- (3) Pri donošenju rješenja i drugih akata donesenih na osnovu propisa Općine primjenjuju se pravila upravnog postupka. Protiv upravnih akata Općinskog načelnika donesenih u prvom stepenu na osnovu Statuta Općine ili propisa Općinskog vijeća u drugom stepenu rješava Drugostepena stručna komisija Općine Stari Grad Sarajevo.
- (4) Protiv upravnih akata Načelnika kao prvostepenog organa, u prenesenim poslovima federalne i kantonalne vlasti, u drugom stepenu rješava nadležno federalno odnosno kantonalno ministarstvo.

Član 86.

(Objava propisa i općih akata)

Propisi i opći akti organa Općine moraju biti objavljeni u „Službenim novinama Kantona Sarajevo“ u skladu sa zakonom i Poslovníkom Općinskog vijeća i isti stupaju na snagu 8 (osam) dana od dana objavljivanja.

XV – JAVNOST RADA

Član 87. (Javnost rada)

- (1) Općina je obavezna, na način utvrđen zakonom, kao i preduzimanjem drugih mjera i aktivnosti, osigurati, razvijati i jačati javnost rada, kao preduvjet efektivnog političkog nadzora i garancije da će Općina provoditi svoje dužnosti u interesu jedinica lokalne zajednice.
- (2) Obavještenja i informacije o obavljanju poslova u Općini mogu davati ovlaštene osobe ispred Općinskog načelnika i Općinskog vijeća.
- (3) Javnost rada se, između ostalog, osigurava da se u postupku pripreme i donošenja općih akata objavi njegov tekst u svim fazama donošenja putem sredstava javnog informisanja, kao i određivanjem roka da se dostave pisane primjedbe na predmetni tekst.
- (4) Javnost rada se osigurava javnim održavanjem sjednica, informisanjem putem sredstava informisanja, objavljivanjem propisa i akata i na druge slične načine.
- (5) Osiguravanje javnosti rada Općine, ne može biti u suprotnosti interesima odbrane i sigurnosti utvrđenim zakonom.

XVI – PROMJENA STATUTA OPĆINE

Član 88. (Promjena Statuta)

- (1) O promjeni Statuta Općine odlučuje Općinsko vijeće, dvotrećinskom većinom glasova ukupnog broja izabranih vijećnika.
- (2) Prijedlog za promjenu Statuta može podnijeti jedna trećina članova Općinskog vijeća, kao i Općinski načelnik.
- (3) Prijedlog mora biti obrazložen, a podnosi se predsjedavajućem Općinskog vijeća u pisanoj formi. Inicijativu za promjenu Statuta, mogu dati građani putem mjesnih zborova, u obliku građanske inicijative.

Član 89. (Poslovnik Općinskog vijeća)

- (1) Poslovnikom Općinskog vijeća bliže se razrađuje postupak donošenja, odnosno promjena Statuta.
- (2) Promjenama Statuta Općine ne može se ukinuti niti umanjiti ni jedno od ljudskih prava i sloboda utvrđenih u članu II.A. do 7. Ustava Federacije Bosne i Hercegovine i instrumentima predviđenim u Aneksu Ustava Federacije.

XVII – PRELAZNE I ZAVRŠNE ODREDBE

Član 90. (Usklađivanje akata)

- (1) Općinski načelnik je dužan uskladiti provedbene akte s odredbama ovog Statuta u roku od 60 dana od dana stupanja na snagu istog.
- (2) Općinsko vijeće je dužno donijeti Poslovnik o radu u roku od 60 dana od dana stupanja na snagu ovog Statuta.
- (3) Mjesne zajednice su dužne donijeti svoje statute u roku od tri mjeseca od dana stupanja na snagu ovog Statuta.

Član 91. (Prestanak važenja Statuta)

Stupanjem na snagu ovog Statuta prestaje da važi: Statut Općine Stari Grad Sarajevo ("Službene novine Kantona Sarajevo", broj 10/98), Odluka o izmjenama i dopunama Statuta Općine Stari Grad Sarajevo ("Službene novine Kantona Sarajevo", broj 17/99), Izmjene Statuta Općine Stari Grad Sarajevo ("Službene novine Kantona Sarajevo", broj 21/04), Prečišćeni tekst Statuta Općine Stari Grad Sarajevo ("Službene novine Kantona Sarajevo", broj 31/08) Odluka o izmjenama i dopunama Statuta Općine Stari Grad Sarajevo ("Službene novine Kantona Sarajevo", broj 16/12), Odluka o izmjenama i dopunama Statuta Općine Stari Grad Sarajevo ("Službene novine Kantona Sarajevo", broj 42/12), Odluka o izmjenama i dopunama Statuta Općine Stari Grad Sarajevo ("Službene novine Kantona Sarajevo", broj 11/13), Prečišćeni tekst Statuta Općine Stari Grad Sarajevo ("Službene novine Kantona Sarajevo", broj 20/13).

Član 92. (Upotreba muškog ili ženskog roda)

Izrazi koji su korišteni u ovom Statutu, a imaju rodno značenje bez obzira da li se koriste u muškom ili ženskom rodu, obuhvataju na jednak način i muški i ženski rod.

Član 93. (Stupanje na snagu Statuta)

Ovaj Statut stupa na snagu osmog dana od dana objavljivanja u „Službenim novinama Kantona Sarajevo“.

Broj: 02-45-415/24
Sarajevo, april 2024. godine



